

## FAULA II.

## LE SANSSUE E 'L BORGNO.

**A** l'era ant la stagion che 'l Soul bujent  
 A brusa la sicoria e i barbabouch,  
 E tutti a scapo a l'ombra, e serco 'l vent;  
 Un pover borgno vej e patalouch,  
 Noujà dal gran calor e tormentà  
 Dal mosche e dai tavan, tutt a tatouch  
 Andava apres disnè darè d' soa cà,  
 Dov' j'era una bialera, e un sit ombrous,  
 E là s' strojassava e piava d' fià;  
 E bin che chiel a fussa timourous,  
 Savend d' esse sicur d' nen esse vdù  
 A piava soëns d'ij bagn bin delissious.  
 Un dì-fra-j' atri, essend là patanù,  
 Ass sent morde le gambe, e dè d' pssion,  
 Pi fort d' lò ch' a l' aveissa mai sentù.

Cos-è-sò? chielo ch' mord?..... tutt' a taston ,  
Treuva ch' a son de baboje an forma d' pess,  
Ch' a dvento curte e lunghe a l' occasion :  
Quantunque a l' abbio faje un po' d' ribress ,  
Ai dis..... soure baboje lassè-stè,  
Voulì rusieme viv s' bele adess ?  
Una sanssua ai rispond : lassene fè :  
Noi i tirouma nen , che 'l sang già guast ,  
Pr-tan ch' i deurve j' œui , peusse scciaire ,  
Noi aitre i conoussouma dall' anast  
Dov' a j' è d' sang cattiv , e nostr' istint  
A lè d' sagnè la gent com' i poulast.  
'L Borgno sentiend lò , l' è stà convint,  
E subit ai rispond : s' a l' è così  
Soure baboje , ij prego a deje drint ;  
Ch' a ciucio pura tan ch' ai fa piàsì ,  
Basta con lò mi peussa deurvì j' œui ,  
E vdde ancour na vota 'l soul d' mesdì.  
Di rest i' m' raccomando , perchè peui  
A l' abbio discession an sul rifless ,  
Che i son un om d' età , pare d' sett fieui.  
Ste Boje ch' ero veuide già da un pess  
( E tanto-pi ch' a vnio da lontan ),  
A son virassie antorn senza ribress  
A l' han ciucià sto Borgno fin a tan ,  
Ch' a comensava già tni' l col pr stort ,  
E ch' a argrignava 'l gambe , e i dí dle man.

Allora 'l pover Borgno tutt smort

Ai dis : pr carità ciuciè papì :

Lassè ch' i pia d' fià son quasi mort ;

I m' avi lusingà d' feme guarì ,

D' rendme la vista , e 'lveme 'l sang cativ ;

Ma voi lo tire tutt fin eh' ai n' è pi ;

Aveime compassion , lasseme viv :

Possibil ch' i sie peui tant afamà ,

Gh' i veuje vdme d' pianta a l' ablativ !

I l' era dai tavan perseguità :

Le mosche am tormentavo e 'lvavo d' peis ,

Ma pur tant a l' avio un po' d' pietà !

Voi-aitre i se taccante coum' la peis ,

I rusie tant 'l maire com 'l grass :

Mangerie 'l bin d' sett Gesie an dontrè meis.

Così parlava 'l Borgno ant coul paciass ;

Ma j' aitre fasend finta d' nen sentì

Lo seguito a ciucè senza ambarass.

A l' era verament l' pr murì :

E j' aitre a seguito..... a segnò-tal ,

Ch' appena l' ha avù d' fià pr podei di :

Pietà soure haboje ch' am ven mal ;

Ch' am erdo , ch' i' son mort , i' son dstiss ,

L' ai pi nen d' sang da empì mes un bocal.

Diffatti a s' è argrignasse com' n' ariss ,

A le restà convuls , e strepitand ,

A j' ha schissaje mese ant col mojiss.

Sta Favola ch' i lese an sghignassand ,  
Veul di ch' venta guardesse da coui tai ,  
Ch' a vivo pr 'l mond an criassand  
Balsamo e sparadrap pr tuti i mai.

—